

Trais finalists per in nov imni naziunal

■ (cp) La preselecziun publica en l'internet ha tschernì da las meglras sis d'en total 208 contribuziuns ils trais finalists. Ils 5 da zercladur vegnan publicgads ils finalists sin il Rütli. La participaziun a la votaziun è stada differenta en las regiuns linguisticas: 61% da las vuschs derivan da la Svizra tudestga, 34% da la Svizra romanda, 4% da la Svizra taliana e 0,1% han vuschà per las contribuziuns en la versiun rumantscha.

«Nus avain grond plaschair da la buna participaziun a la votaziun. L'interess extraordinari da la Svizra romanda avain nus gia sentì durant il temp d'inoltraziun: 70 da las 208 contribuziuns derivan numnadamain da quella regiun linguistica. Plaschaivel è er il grond interess a la concorrenza da las medias naziunalas ed internaziunalas», di *Jean-Daniel Gerber* ch'è responsabel per il project. Sco president da la Societad svizra d'utilitad publica (SSUP) ha Gerber lantschà avant dus onns la tscherna d'in nov imni naziunal che duai tematisar e promover las valurs centralas da la societad dad oz.

Ils trais finalists vegnan publicgads ils 5 da zercladur a las 14.00 sin il Rütli. A partir da las 12.30 fin las 14.00 ha lieu là la vernissascha da l'exposiziun «iCH».



Il Chor da giuventetgna svizzer ha interpretà las ovras inoltradas.

MAD

En il rom da l'exposiziun «iCH – ich bin ein Teil der Schweiz» tematischan differentas artistas e differents artists l'individì («ich») sco part da la Svizra («CH»).

La confruntaziun cun las identitads svizras duai rinforzar l'acceptanza da la varietad svizra e sminuir ils pregiudizis.

L'exposiziun vegn organisada dal NCBI (National-Coalition Building Institute Svizra). Guida e workshops pon ins reservar sin giavisch. Quels han lieu il 1. d'avust l'avantmezdi. La finissascha è dumengia, ils 20 da settember a partir da las 10.30.

Ulteriuras infurmaziuns chattais Vus sin:
www.projekt-i.ch